

NU-i International Seminar ka ayongzüka agiogo



Prof. G.T Thong (Pro-Vice Chancellor, Kohima Campus, NU) den Chiang Mai University, Thailand nungi Dr. Ariya Svetamra aser Dr Arratee Ayutacorn na aser NU Professors aser Lecturer tem International Seminar agiba mapang tangokba noksa nung angur.

Dimapur, Monupii/May 4 (TYO): 'Women and Development: Reflections from Thailand & Nagaland (India)' dak sendakba nung International Seminar ka Women's Studies Centre aser Department of Education, Nagaland University na longjemer May 4 nü Kohima Campus, Meriema nung ayongzüka agiogo.

Iba seminar ya shilem asem küma lemsar agi, kong inaugural session aser technical sessions ana densema liasü.

Sentong nung Prof. G.T Thong-i (Pro-Vice Chancellor, Kohima Campus, NU) okila o jembi aser pai, kati ka nungi angazüktepsü atema pei arrtsü adener shisatsü lemsatepsü, shisatsü balala tejakdangi bener aotsü aser arrtsü adena bushisüngdangtsü atema iba amala sabang ka agütsüba asoshi sentong ayongertem nem tenügsang agüja liasü.

Paisa, sentepa aliba lokti

dang lokti nung ajak liromedema renlokyonga aotsü atema tetsürtem anisemtsü asoshi ayongzüka nung shilem agitsü ayongzü.

Onük dak ajemdaker Thailand den medemdanga jembiba mapang Thailand kübok Chiangmai University nungi Dr. Ariya Svetamra-i 'Community based Tourism and Empowerment of Ethnic Women in Upper North Thailand' onük nung ajemdaker jembi aser Dr. Arratee Ayutacorn-i 'Women's Negotiation on Land Dispossession' onük nung ajemdaker jembi.

Kasa mapang nung Nagaland University nungi Prof. Jano. L Sekhose-i 'Navigating the World of Naga Women Down the Ages and Beyond' indang lemsatep, Prof. Lungsang Zeliang-i 'Visualizing Naga Women's representation in Education' indang lemsatep aser Dr. Petekhrienuo Sorhie-i 'Localizing SDG5 in Nagaland: Issues and Challenges' indang

lemsatepa liasü.

Paper presentations agütsüba sülen loktiliba, rongsenketzung aser sobaliba ajanga tetsürtem renloka aoba nung tetsükdaktsü adokba dak sendakba nung sensaksema liasü. Sensaksem mapang Nagaland aser Thailand naprongla nung inayakyimtem aser shisatsütem lemsatepa liasü.

Technical sessions ana ya Education Department nungi Dr. Limala (Asso. Prof.) aser Dr Neizou Mero (Asst. Prof.) na lenisüba nung agia liasü. Seminar lapokba sentong ya Head, Department of Tenyidie Dr. Petekhrieno Sorhie lenisüba nung agi aser Dean of Humanities and Education NU. Prof. Buno Zetsuvi-i lokti pela agizükba o jembiba liasü. Maneni Department of Education HoD in charge Dr Khotole Khieya-i key note speaker aser shisalen agütsürtem nem tetushi agüja liasü.

May 3 nü De-Oriental Hotel nung workshop ka ayongzüka agi

Dimapur, Monupii/May 4 (TYO): Comprehensive UIP Review Development of immunization coverage Improvement plan dak sendakba nung workshop ka May 3 nü De-Oriental Hotel Kohima nung ayongzüka agiogo.

Iba workshop ya, tanurtem shilem 95 nem vaccine agüja vaccine agi nokdangtetsü akokba tashidaktem nungi tanur ajak kümzüka toktsütsü nükjidong nung ayongzüka

agiogo. ITSU- Ministry of Health and family welfare-i, 2022 küm June 11 nungi 18 tashi state nung Universal Immunization Coverage lepa repranshiogo aser sentong maneni benoka inyaka 2023 küma iba workshop ayongzüka agiogo.

Workshop nung shisalen sayurtem rongnung Dr. Harpreet Singh, Dr. Kamlesh Kumar, Dr. Sonu Gupta, Dr. Swadesh Prasad, Paras Jain, Dr. Sandeep

Rathod, Dr. Mona Chopra, Ashok Sharma, Dr. Rajashree Roy, Mahesh Mishra aser Satish Kumar nung densema liasü aser parnoki AEFI & VPD Surveillance, Logistics & Supply chain, data recording & reporting, communication, urban immunization amala onük balala nung ajemdaker tangazükba agüja liasü.

Iba workshop ya group work presentation ka agütsüba sülen tembanga liasü.

Manipur tensa azüoktsü...

Kin ana tsüngta mangatetep adokba ajanga iba tensa ya ajurua lir, ta pai ashi.

State sorkari 'reserved forest' aser 'protected areas' tem survey agitsü sentong aliba anema tribal nisungtemi longkak aiter, kechiaser ibai parnok aridoktsü asoshi inyaker ama ajiteter.

Ano ST list nung Meitei kin inoktsü merangba anema parnoki longkak aiter.

ATSUM ajanga ayongzüka solidarity march yimjung nung tembanga sülen mejangjaba nisung kari Churachandpur nung aliba Anglo-Kuki War Memorial gate rongdoktsüba sülen azüdokshi ya tenzü, ta ATSUM lenirtemi ashir.

Brehostibarnü Meghalaya Chief Minister Conrad K Sangma-ia Manipur nung tensa majungba indang khuret

lemsatepa liasü.

Sangma-ia Manipur nung yimjung alitsü asoshi ayongzüka liasü aser nüburtem dang taremsüktep akatsü aser azüdokshi nungi pila alitsü ajungshia liasü.

Evangelical Fellowship of India (EFI) ajanga sangdong ka nung Manipur nung tensa mejungi akumba indang khuret lemsatepa liasü. Tai maket takum samaba, ki o jen raksatsüba aser tekülem ki rongdoktsüba asoshi onoki mangyim tejashi lemsateper, ta ashi.

Yimjung alitsü aser nübur ajunga kumzüka ayutsü asoshi sorkar dang tekeraba nung mera agitsü ajungshir. Nisung ajak Tsüngrem mesükba nung yanglu, anungji yimya tajung nung akumsübo amshitsü tim. Tang atalokba azüdokshi ya item

tesayuba anema lir aser Manipur nung aliba nüburtem nem timtem tulu bener arutsür, ta EFI-i ashi.

Maneni United Christian Forum of NEI-ia sangdong ka nung Manipur tensa atema süoki ia bilemstüba aser shisabuluba lemsatepa liasü.

United Christian Forum of NEI (North-East India) indang odongtar Allen Brooks-i sangdong ka nung telok ajak dang atsü-anem akatsü aser tensa tajungba dangi arudaktsütsü asoshi ayongzüka liasü.

United Christian Forum of NEI ya India indang North Eastern Region nung Khristanpur asoshi nokdakba tentet ka lir, aser parnoki kija aser lokti tentet balala dang azüdokshi nungi pila alitsü aser yimjung ken o jembitsü ajungshia liasü.

Nagaland University nung MA Anthropology agütsütsü

Dimapur, Monupii/May 4 (TYO): Nagaland University (A Central University) Vice Chancellor-i Academic Session 2023- 24 nungi tenzüka M. Sc Degree den bendenloksema Anthropology Department nung M.A. Degree

bendenloktsüogo. Registrar-i April 25, 2023 nü agütsüba osang ya Academic Council-i asadangtsü. Iba dak ajemdaker UG (Under Graduate) nung arts azüngba kaketshirtem nem Anthropology nung MA Degree agütsütsü.

School Education-i tanurtem admission indang metetdaktsü

Dimapur, Monupii/May 4 (TYO): Directorate of School Education tetuyuba dak ajemdaker Principal Director of School Education-i sangdong ka ajanga, 'Nagaland Right of Children to Free and Compulsory Education (tekübokba jenjang nung aliba tanurtem atema entry level nung Class I mesüra Pre-school nung tanur admission Minimum 25 %) Rules, 2016' kübok provision tem benoka inyaksangshitsü atema

inyakyimtem Department-i asateter aliba metetdaktsüogo. Anungji ken o dak sendaka alir ajak dang RTE Act, 2009, Section 12 (1) (C) kübok provision tem benoka inyaksangshitsü atema inyakyimtem dak sendakba nung osang agütsüba ata alitsü metetdaktsüogo. Osang magütsü tashi April 12, 2023 nü agütsüba Office Notification sota ata alitsü, ta kasa sangdong ajanga metetdaktsüogo.

Changtongya SDDCF senden menogo



Dimapur, Monupii/May 4 (TYO): Changtongya Sub-Divisional Departmental Coordination (SDDCF) senden May 4 nü SDO(C) Office nung menogo.

Iba senden ya SDO(C) lenisüba nung agia liasü. Pai senden nung alakteta jaoker 21 A/C MLA Nukluktoshi pelashishia agizük aser 2023 General Election nung takok tenügsang agütsüba den senden nung densema aliba ketdangsurtem ajak pelashishia

agizüka liasü. Paisa, SDDCF (Changtongya) nükjidong aser inyakyim balala indang metetdaktsü. Senden nungsa ketdangsurtem metetpelaba mapang agi aser iba sülen alakteta jaokeri o jembiba liasü. O jembiba mapang MLA Nukluktoshi-i, Changtongya meketa aliba tesemtem terenlok asoshi pa den teka amteper inyaktsü asoshi ketdangsur aser staff tem ajak ayongzüka liasü. Paisa, takokba tashi teyari agütsütsü nangzüka liasü.

UGC-i CU- Chanya portal amenoktsüogo

Dimapur, Monupii/May 4 (TYO): University Grants Commission (UGC) (Ministry of Education, Government of India)-i May 2 nü Central Universities tem atema recruitment portal ka dang asütsü asoshi CU- Chayan portal amenokogoo.

Iba recruitment Portal ya Central Universities tem atema mejeta design süa yangluba lir.

Iba portal yagi Central Universities ajak nung vacancies/advertisements/ mapa tem metetdaktsütsü atema arok sabang ka agütsür.

Iba portal ajanga applications tem jaokba nungi tenzüka

recruitment inyakyim ajak online kümdaktsür aser portal amshir ajak nem osang agütsür.

Tang university balala nung inyaksangshia aliba ama recruitment inyakyim kübok jenjang ajak university temi dang achaayanga universities aser applicant naprongla atema inyakyim tezübaba kümdaktsütsü asoshi UGC-i iba portal amenokogoo.

UGC Secretary Prof. Manish R. Joshi-i, May 3 nü sangdong ka ajanga Central Universities ajak dang iba link <https://curec.samarth.ac.in> amshia recruitment inyakyim ajak asoshi CU-Chayan portal amshitsü tetuyuba agütsüogo.

NSCN/GPRN-i benjung salem lemsatep

Dimapur, Monupii/May 4 (TYO): NSCN/GPRN-i sangdong ka ajanga Khiamniungan nungertem den 'Miu' benjung salem lemsatepogoo. Iba benjung ya May 5 nü amunger aser benjung mapang alu nung metsüjangnatsü junga adoka alu jung arutsü atema temaotsü meshizüka amunger.

Ano Miu benjung amungba nükjidong kaji okola nungertem den tesendaktep tajung yanglushitsü asoshi lir aser parnoki chirnurtem (nephews aser nieces)

yimji yimjung nung alitsü aser tsükchirtem nungi kümzüka alitsü atema sarasademja iba benjung amunger.

Khiamniungan nungertem yimji yimjung nung tashi ita anema alitsü imlaja atar ajita asünungdang parnoki maneni Naga nungertem ka ama temeimtem nung alitsü atema tali tesendaktep akangshitsü asoshi inyaksangshitetsü, ta NSCN/GPRN (Akato Chophi) MIP sangdong ajanga metetdaktsü.

Mulungnen



Ojala Itisangla 28.11.1935 - 27.04.2023

Onoki teti dang meima aliba ojala ITISANGLA JAMIR (Akhoya) shirang yipten nung aliba mapang nungi la iba lima nungi pilar onok mangyim jashi nung aliba mapang kija-kibong, arogo aser lokti balala nungi shirnokisa ozü dang aria bilema yaritepogo, nenok ajak den onoki kangasa pelaba lemsateper.

Ozüibo nenok nem kecha meyipa magütsütetsü saka nenok temeim mapa tajung asoshi asen Tsüngremi nenok ajak talubosa meyipa moajangma ta onok tamang agi sarasademtsür.

- Temeim Chirnur, Anük-apang aser Kinungertem.

Aibelener kati taochi meshiba Tir Droupadi Murmu-i magizük

New Delhi, Monupii/May 04 (Agencies): 2008 küm Maharashtra nung arrshi küm pezü tetsür chanu ka tashiyim amshia raksatsür long agi onsetba ken o nung aibelensangi Tir, Droupadi Murmu dang taochi meshiba temepishiba agütsü, saka Tiri magizük, ta Brihostibarnü Rashtrapati Bhavan osang ajanga metetdaksü.

Vasanta Sampat Dupare-i pa anema obendang reprangshitsü mepishi saka 2017 küm May 3 nü Supreme Court-i ibaji magizüki tasüba temerenshi agütsütsü obendang agüja liasü.

Iba ken o dak sendakba nung Union Home Ministry-i taküm

March 28 nü President's Secretariat nem tebilemba onük ka agüja liasü.

"Taochi meshiba temepishibaji Tiri magizük," ta President's secretariat-i metetdaksü.

2008 küm tashiyim amshia raksatsür tepsetba ken o nung 2014 küm November 26 nü trial court aser Bombay High Court-ia Maharashtra nung alir, Dupare nem tasüba temerenshi agütsütsü obendang agütsür liasü.

Aibelensang aser tetsür chanula naji kiyonger liasü; tebursangjagi tanurji mesüzüka anir orr tashiyim amshia raksatsüba sülen long anati onsetsa südaksü.

J&K nung army helicopter ka tsükok



May 04, 2023 nü Jammu & Kashmir kübok Kishtwar anasa Army indang ALH Dhruv Helicopter tsükokba sülen kümzükba maparen inyakdang tangokba noksa nung angur.

New Delhi/Srinagar, May 04 (Agencies): Brihostibar anepdang Jammu & Kashmir kübok Kishtwar district anasa Army indang ALH Dhruv Helicopter ka tsükokogo aser iba lendong nungji pilot ana den technician ka yiru.

Kishtwar district kübok Marwah area nung tayimtsüji tsükok, ta ketdangsertemi metetdaksü.

Army ketdangsertemi ashiba agi, pilot aser co-pilot naprongla iba lendong nungjagi kümzükogo ajisüaka tenaprong yirur treatment agidar.

Indian Army-i sangdong ka ajanga, "Anügdang 11:15 ako meta Army Aviation ALH Dhruv helicopter ka operational mission aoba mapang nung helicopter nungji technical timtem kar adokba ajanga Jammu & Kashmir

nung Kishtwar region kübok Marua ayong anasa tayimtsüji anentsü meranga liasü. Ali memedemba den külemi arem asüba aser ajungbena anentsü merangba agi tayimtsüji junga manenteti iba lendong atalok," ta metetdaksü.

"Lendong atalokba sülen Army rescue team iba tesem jagi ao. Tayimtsü nungji pilot ana den technician ka liasü. Par asemprongla yirua Command Hospital, Udampur-i anir ao. Iba tatalokba bushisüngdangtsü atema tuyuogo aser maneni bushisüngdangdar," ta Indian Army-isa metetdaksü.

Taküm March ita nunga Arunachal Pradesh kübok Mandala hills area nung Indian Army Aviation Cheetah helicopter ka tsükokba lendong nung pilot ana asü.



May 04, 2023 nü New Delhi nung Bharatiya Kisan Union (BKU) nung züngsemtemi Wrestling Federation of India (WFI) tongti, Brij Bhushan Sharan Singh anema longkak aiter wrestler tem pusema jajaba noksa nung angur.

Cyclone Mocha agi Odisha aser West Bengal kongshitsü: IMD

New Delhi, May 04 (Agencies): Birhostibarnü India Meteorological Department (IMD)-i, Cyclone Mocha ta ajaba yipru mopung tesashi tang southeast Bay of Bengal nung lir aser May 7 nungi May 9 tashi nung iba yipru agi anüdoklen India tzüymküm atongtsü, ta metetdaksüogo.

IMD Director General-i, "May 6 nü Southeast Bay of Bengal nung yipru mopung tesashi ka kümteptsü aser ibaji ajanga May 7 nü kasa region nung low pressure area ka tentetsü. May 8 tashi nung Southeast Bay of Bengal nung iba yipruji tesashiba akümtsü

as central Bay of Bengal tsütsüleni aotsü," ta metetdaksü.

"Low pressure area kümtepta sülen yipru lenmang aser yipru tesashiba akümba osang tejangja metetdaksütsü," ta paisa metetdaksü.

Cyclonic yipru ajanga May 7 nü Southeast Bay of Bengal nung mopung ghonda ka nung kilometer 60 tashi keraa aontsü. Iba sülen mopungji ano tekara aontsü, aser ibaji ajanga tzüym nung tzüsem mesüngjemtsü.

Weather department ketdangsertemi iba mapang nungji tzüyimi angopui maotsü atema angopurtem nem tekümdangtsü metetdaksüogo.

Odisha aser West Bengal na ya yipru agi mapang shia kongshiba state ana lir, ibayongji state ana nung ketdangsertemi iba yipru atema renemshidar.

Odisha Disaster Rapid Action Force (ODRAF) aser National Disaster Response Force (NDRF) nati iba yipru atema renemshidar.

IMD-i iba Cyclone nungja 'Mocha' agütsüogo aser tang tashi nung IMD-i yipru mopung tesashi nungja 1,689 tashi agüja lir. Yemen linüki 2023 küm mezüngbuba cyclonic yipru dang Mocha aja. Mocha ya Yemen nung nungtugu coffee industry aliba yimti nungja lir.

Jaishankar-i China Foreign Minister Qin Gang den senden amen

New Delhi, May 04 (Agencies): Brihostibarnü External Affairs Minister, S Jaishankar-i China Foreign Minister, Qin Gang den senden amenba mapang anüdoklen Ladakh kübok Line of Actual Control (LAC) nung arrtsü mangatettep aliba ken o süoka jembiogo.

Shanghai Cooperation Organisation (SCO) nung züngsem linüktem nungi Foreign Minister tem senden aliba mapang Benuim beach resort ka nung tena jurila senden amen.

Tesüiba ita ana tsüngda Jaishankar aser Gang na senden anabenbuba amener. March ita nunga China foreign minister-i India semdanga G20 foreign minister tem senden

nung dena liasü aser iba mapang nungji tena jurila senden amen.

Jaishankar-i Qin Gang dang, India-China tsüngda tesendaktep junga mali aser ibaji anüdoklen Ladakh nung arrtsü mangatettep aliba ajanga lir, ta ashi.

Taoba hopta senden ka nung Defence Minister Rajnath Singh-ia China defence minister, Li Shangfu dang, China-i arrtsü mangatettep dak sendakba tezüngzüktep alema inyakba agi linük ana tsüngda lenla balala nung tesendaktep tamajungba kümogo, anungji tanga aliba tezüngzüktep kübok arrtsü mangatettep ken otem bentetsüla, ta metetdakja liasü.

April 27 nü SCO defence minister tem senden aliba

mapang jurila senden ka nung Rajnath-i China defence minister dang arrtsü mangatettep ken otem bentetsü lemsatep.

2020 küm June ita nung Galwan valley nung linük ana sepaitem tsüngda rara adokba sülen linük ana tsüngda tesendaktep ano tamajungba aküm.

June 15, 2020 aonung India-China arrtsülen Galwan Valley nung sepaitem teka sangshitepa raradang India nung sepa 20 asü.

Iba rara nungji China nung sepaitem asüba osangbo mejangja ajisüaka US intelligence osang ajanga ashiba agibo, kasa rara nungji China nung sepaitema tajemba agi 35 asü.



May 04, 2023 nü Jammu & Kashmir kübok Baramulla district nung sepaitem aser kiralongrartem tsüngda khatapba tesem nung sepaitem adenshia aliba noksa nung angur. Iba rara nung kiralongrar ana kshetogo.



TIR YIMYIM YIMOBILEM (EDITORIAL)

DIMAPUR ROGONÜ, MONUPII (MAY) 05, 2023

ST atema tenla ki rongtsür na ?

Asen kidanger Manipur nung Manipur senso Meiteis nungertemi asenok tenem nung alir kintem nem agütsüba kasa Scheduled Tribe jenjang parnok nema agüjang ta akangba anema All Tribal Students' Union of Manipur (ATSUM) teloki lokti senden ayongzüka akaba mapang meimlaba lendong atalokba nungi tenzüka tang tashi nung Manipur tesem balala nung yim aika mitsü küma rongdoktsüogo aser nisung taküma aika laluogo. Atangji, Manipur nung Meitei nungetemjiang shitakba Manipur nung aser nütsünga parnok teimba saka alibo parnok tilaba, kechiyong Meitei nungertemi lenden lima dang mesemtet aser parnok aliba lenden meketa aliba tenem ajaklen Naga aser Kuki nung aser amala tenem kintem lir. Aji oda, Nagaland ama state ka nung dang süaka temeyoktep kin aliba agi aiben tagitsü maparen aika nung Meitei nungertem o tenem nung alir kintem na tsüngda meputep adoker. Ibaji dang masü mapang kabo Manipur nung Naga nung o Kuki nung na tsüngda kanga tsükchitepa liasü. Atangji, Meitei nungertem o tenem kintem na tsüngda mepelatep adokbaji aiben Manipur nung terenlok mapatem inyakba tsütsü senotsü teimbaka Meitei nung lushi lenden lima tilaka nungji teimba endokba tsütsü adoker. Ano, tatar menden 60 aliba Legislative Assembly nunga Meitei nung alidak lenden len menden 40 lir aser tanünga menden 20 jiang tenem kintem asoshi lemzüka lir. Aji oda, tenem kintem Scheduled Tribe (ST) asünungji, parnok nem lemzüksüba tatar menden (assembly constituency) 20 rongnung 19 ST purtem asoshi shiteta yuja lir aser Scheduled Caste atema menden ka shiteta yuja lir. Ibayongji, tatar senden nung teti lenden len alir tatar 40 jagi mulungbalen ken o latettsüsa akümer. Aji oda, tanga Meitei nungertemi aginüba ama parnok nem ST jenjang agütsütsüla ta sashia nokdakertemji lenden nung adoker tatartem lir. Atangji, Meitei nungertemia asenok ama ST jenjang aginüba nungji kecha taibo malia ta bilemer, ajisüaka asenok ama tang ST rogo purtembo maparen aika nung akoksatsü, kechiyong tanurtem technical azüngtsüba menden shiteta yutsüba nungi tenzüka par State Civil Service aser UPSC tashi nung tang alir ST purtem asoshi lemzüka aliba shilem nungi dang lemsatsü. Ibaji dang masü saka Manipur nung state assembly seat nungi shir kechisa ST atema lemzüka ali, item ajaki arok meyong akümtsü, iba jagi Manipur nung alir ST kintemi Meitei nungertem nem ST jenjangji magütsütsüla ta akanger. Atangji, Meitei nungertem nem ST agütsütsüba center mulung, ajisüaka parnok ST meshiba ajanga teti atema Manipur telongjem raksaogo. Aji dang masü Meitei nungertemi ST jenjang meshiba aser tenem kintemi parnok nem ST jenjang magütsütsüla ta anema ola adokbaji tamangba yimsü dak aketba onük ka masü. Idakji tamangba yimsü ana tsüngda tsükchitep ken o adoktsü lenmang mali. Ajisüaka, Manipur nung Khristan-tem tenla ki aser kiojen rongtsüba mapa jagi yangji alir nübertem nükjidongbo ST dang nungi tuluba jenjang ka bushir amai angatetter. Iba lendong matalokdanga asenoki Imphal nung Manipur government-i Khristan pur tenla ki ka bentsüba asenoki ngugo. Ashiko, ibajibo government temeten aliba agi inyak südi, ajisüaka Tsüngrem külemdak tenla ki aser tanurtem tajung kümdaktsüdak kaketreju ama mapatem asoshibo government-i teyari agütsütsü melen bendoktsüba dang masü saka repranga lia rongdokdaksüra, ajibo ST jenjang aginer masü saka Khristan-tem maginer asütsü. Taoba küm ishika tsüngda India nung Khristan purtem reshikangshiba aser Khristan mekümdaktsütsü asoshi temzüng ozüng latetba asenoki meteta lir. Aji oda, India senso süaka Khristan purtembo India nung chiyongtsüa pei chinütsü machitettsüba tensa ka nung asenok liadokogo. Atangji, asenok Naga Khristan-tem, talisa Baptist purtem aikati tangar Khristan purtemi ajuruba reshikangshi tetsübuttsü timtem tensa tia ka danga majuru dang asütsüa akok, iba jagi asenoki süoki ia mebilemi alitsüa akok. Ajisüaka, tangbo asen kidanger tenla ki dena rongdoktsüdarji, asen lima nung asenok arogo nungertem tsüngtsüng temer pei tenla kidang adenshir parnok asoshi sarasademtsütsü tensai akanger.

OLEMSABANG

TZÜMAR MATSÜNGDANG ASENOK YA OKORA LIASÜ

~ T. Meren Paul, Kohima

(Yashi adok nungi...)

Ano Naga ta ajabaji tetezü anasemka nung amshir. India nung per (snake) külemer kin ka lir aser parnok dangji "Naga" ta ajar aser item tetsür dangji Nagini ta ajar, ano Naga Sadhu ta sürabang tebur kodanga süoshi kecha magi zhüsa ku memejep ku talang waa yur Hindu tenlaki nung tsüngrem külema alir dang ajar. Asenok dang Naga ta ajar anungji shilu palaka süaka Nagatsür dang tzümar oshi (Hindi & Assamese) agi Nagini (feminine gender) ta ajar. Assam nungeri asenok Nagatsür (Nagini) kanga lujabo mejemtsü südi kechiyong Ahom chuba ana tashi agimapang palala nung Naga tsür (Nagini) agiba otsü tejangja lir.

Aor otsü nung Ahom chubai Nokrang Tongtiba-er jala (Nagini) tebur onsara ajungba (exquisite beauty) indang angashia la ji pa kinungtsü asütsü ani asüngdangi par Chidangodang dem Nokrang yimdaki yok aser senmen tulu agütsütsü nangzük. Nokrang Tongtiba par jalaji magütsütsü tatemtsü atemzüka senmen tuluji masü saka tamakoktsü asütsü ta bilema Tenem ozü tepen ozumi tanak agi anaben temdanga aliba ka meshi. Iba telangzüba bener chidangodang rokomeyipa lua chuba dangji alima nung maliba ozü ka meshir ta ashidang chubaji temenüang menü ta asü. Chubai Ozükümerdem tenem ozü taküm aputsü asoshi arem min tulu jagi yok aser Ozükümerdem jagi mapang talangka magii ozüji pua bener aru. Chubai mozü toli sentsü tanak yanglur tenem ozümi nungji temdang tanapubaji teploktsü aser tananü reprangdang nung pai teploktsüba temdang tanakji pa sasaha adokba sentsü tanak denji mesükteper liasü. Anungji chubai tananüjia ano mozü sentsü tanakji ken teploktsüshi aser yamaji ita junga mozü sentsü tanakji konglokdaktsü. Kodang ozümi nung tanak temdang anaji kasa akum chubai ozüji makang tulu ka nung sepa bener par chidangodangdemji Nokrang yimdaki tua ozüji agutsürjembiba ama tetsürlaji anir alutsü yok. Jembiba meyazütsü asünung Nokrang tongdibai tejak mekumer temulung zürepa jalaji anir yok aser Ahom chuba kinungtsü chubatsür aküm. Iba otsü ya Pentochepchep Retsüng nung tejangja zülua lir.

Tanapuba Nagatsür (Nagini) Ahom chubai agibaji Konyaktsür tenüngji Dalimia liasüta Jorhat nung Assamese nung Doctor kati kü dang ashi saka Konyak nung tenüng palaka Watlong sudi. Ahom chuba Sulikpha shiba ano tanur asüdang chuba aküm, pa dang Lora Raja "the boy king" ta aja. Pa chuba kümer külen pa den chuba mendenji raktepa lir ta tsüpuba agi chuba chirdem adianu tanungba ajak pai tepset. Saka chubachir rongnungi Godapani pua marujungijena odaktsü. Godapani-i par jabaso anaji Naga lima Konyak aser Phom lushi talangi pelenina bener oa meyima ayu aser pa Assam nung Naga nung subotsü sübor jenshia senzü. Pa kinungtsü Jotiy moi koma lir ta ngalajilatsü pai künu par yim bushia aru, saka idangji pa kinungtsü Jotiy moi ji süngdong ka nung alenloker merenshia züka nü kinungbu kolen atsüka lir ta Lora Rajar-er nütsüng demi rishikangshia liasü. Lai tahlang nungi yakta la kinungbu reprangtet aser nükpü agi oadokang ta sakloktsü aser kinungbuji kümzük saka labo yangji taküm sama. Iba sülenji ang Godapani-i Konyaktsür laji agi südi kechiyong Assam Puranji Sir Edward Gait-i züluba nungji Konyaktsürla indangji shia mangur saka Godapani Garo lima Garotsür ka den jenoka lia Tongdipur (Bor Gohain) demi bushia anir arur Lora Raja chuba melena pa Ahom chuba kümdaktsüba otsü zülua angur. Ashiko par jabaso anaji Konyaktsürla jagi anepalua ali südi. Longleng anasa Hakbang yim kiertsüng nung Godapani-er telok jenoka aliba lungpok ka tang tashi lir. Godapani kinungtsü Konyaktsürla sür külen temang aremba tesem ji Naginimara ta aja aser la aremba leperji Tzüla (Dikhu) ayongküm nung Naginimara nungi Wakching-i atuba lenmang lenkalen yanglua lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Lim Arogotem nung toklang tenzüker kinüngtsütem sentong agi



Impur, May 04, 2023 (TYO): ABAM Women Ministry ajanga maneni Zone 1-7 Lim Arogotem nung Toklang Tenzüker Kinüngtsütem sentong "Tenzükba nung Külem" Omen nung ayongzüka May 2-3, 2023 anogotem nung Impur nung kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Tenzüker kinüngtsütem ajak agi parnok 145 arua iba sentong

nung aden.

Okilaba mapang Mrs. Alemla Mozür, Secretary, ABAM WM ajanga ashiba agi, kibong ka asoshi tenzükbawadang ya nisung ka kisung shilem masü saka apuani na rangben shilem lir. "Tabensabanung tenzüksüji apuani arok shilem, ta angatetbaji lir. Anungji maneni apuani külemi tabensabanung angateta tenzüksü nükjidong nung iba sentong ya ayongzüka," ta laisa metetdaksü.

Sentong nung shisalen sayurtemji: Rev. Dr. Prof. Mar Pongener, Executive Secretary ABAM, Mrs. Putula, Teacher, Deaf Biblical Ministry Dimapur, Mrs. Alemla Mozür, Secretary ABAM WM aser Mrs. T. Arenla Longkümer, Coordinator ABAM WM nung liasü.

Tsüngremi ABAM Lim Arogotem nung toklanga tenzüker kija-kibong maneni moajangma, ta kasa sangdong ajanga lemsatetp.

SatanCon mapang satan külemer nisung 98-i Khrista agizük



SatanCon sentong agiba tesem anasa Khristantemi sarasademba noksa nung angur.

May 04, 2023: April 28 nungi tenzüka Boston nung Satanic Temple-i ayongzükbaba SatanCon sentong agiba mapang nung America tesem balala nungi Khristantem Boston nung adenshi; parnoki Tsüngrem dak mamangertem aser Satan külemertem ajurua Yisu Khrista temeim indang lemsatepba ajanga satan külem 98-i Khrista agizük, ta osang ka ajanga metetdaksü.

SatanCon sentong ya April 28 nungi April 30 tashi agia liasü.

Sayutsünger, Sean Feucht-i twitter ajanga video ka lemsatetp, aser iba video nungji SatanCon sentong nung adenertem rongnung kati Laishiba shisaba noksa lir.

Ajisüaka iba sentong agiba tesem nungji Khristantemi satan külemertem ajurua Khrista osangtajung lemsatepba ajanga nisung 100 jungnüaibo Khrista sülen anidaksü telemtetba agiogo, ta Sean-i metetdaksü.

"Satan sentong (Boston nung SatanCon) tenzüksü

atema parnoki Laishiba shisaba mapang nung lokti nung sayutsüngeritem ajanga nisung 98-ibo pei taküm Yisu nem bendanga agütsüogo," ta May 1 nü Sean Feucht-i twitter ajanga metetdaksü.

Osangbener den jembidang Intercessors for America (IFA) nung lenir, Lynn MacAskill-ibo, "Khristantema iba sentong agiba tesem nungji liasü aser SatanCon nung adenertem ajuru saka iba sentong nung adener satan külemertem tekümtet anguba osangbo mangashi," ta ashi.

"Ajisüaka Revive Boston aser YWAM nungi sayutsüngeritemibo satan külemer 98 tekümtet anguba aser nisung 15-i tanaben Kibuba nem bendanga agütsüba osang lemsatepogo," ta MacAskill-i ashi.

Sean Feucht-i ashiba ama SatanCon sentong agiba tesem nungji Khristantem aika adenshia liasü, ta laisa metetdaksü.

"Team balala nungi Khristantem aikati SatanCon sentong nung adenertem ajurua osangtajung lemsatepogo, anungji metsüjangbosa prokogo. Tsüngremi mapa inyakogo, kechiyong onok iba tesem jagi oteta liasü," ta lai metetdaksü.

MacAskill-i, "Iba sentong nung adenertem den Yisu tenüng nung temeim lemsatepsü atema maangka aika nguogo. Iba sentong metenzükdang US tesem balala nung Khristantemi iba sentong nung adentsüpur Khristantem atema sarasademja liasü," ta ashi.

"Parnoki Arogo anemyonga Yisu tenüng angashidang parnok aikati menürem, ajemalua aküm mesüra tenük nungi nükztü aluba sayutsünger aikati kü den lemsatepogo," ta lai ashi.

MacAskill-i, "Metsühjangbo prokogo anungji tamangertemi maneni alima den Khrista temeim indang lemsatepsüla. Metsühjang aintsü atema tamangertemi maneni sarasademtsüla," ta lai mepishia metetdaksü.

ANOGO ABEN TSÜNGREM DEN

Jenang Maka Tekülem (T.ken 115:1-8)

Tenüngsang Ken 115 nung asen Tsüngrem taküm aliba Tsüngrem temoatsütem indang ashir. Pa kintem "süngyanglu rongnung ka masü." "Parnok süngyanglutem taribi aser hon, nisung teka agi yangluba mapa lir" (t.4). Tanüa ibaji koda ochi aikati taribi aser hon Tsüngrem külemer.

Ken züluri süngyanglutem aser item külembaji jenang maka ta rasaa ashir. "Parnok tebang lir, saka parnoki mejembir; tenük lir, saka parnoki mangur; parnok tenarong lir, saka parnoki mangashir; parnok teni lir, saka parnoki memenemtetter. Parnok teka lir, saka parnoki meinyaker; parnok tetsüng lir, saka parnoki mejajar; mesüra parnok terok agi ola madoker. Shirnoki parnok yanglu, nisung shia shibai parnok dak temulung alemer, parnok mesüka akümstsü" (t.5-8). Koda Tsüngrem memesük. Khristantem tenangzükbatem kar- asen Tsüngremi asenok den jembir.

Asenok tekümzük lir, kechiaser kechi ataloker Pai angur. Asenoki sarasadem kechiaser Pa narong asen tsütsü lir aser Pai angashir. Parnoki Pa tenüng asanger. (Laishiba nung, tarungba tenla terunemji asenoki Tsüngrem külemba külemba Pai agizükba noksa lir). Asenok tashi lir kechiaser ajak inyaktetba teka Pa kar.

Asenoki külemba Tsüngrem mesüka asenok akümer. Shirnoki silver aser hon külemer itemji mesüka parnok akümer - tasü, taküm mali aser temerang. Aikati parnok mesüka Tsüngrem yanglur. Saka Tsüngremi Pa mesükba nung asenok yanglu, aser asenoki Pa külemstsü Pai aginer.

Khristantem taküm aliba tamang kar aser taküm aliba Tsüngrem tenzüker. Nai Pa O tali züngra, Pa telungjem kara aser Pa tenüng sangra, na tali Pa mesüka akümstsü. Pa tenangzükbatem, tekümzükba, sarasadem aser ain na kar.

Impur nung music training agidar



Impur, May 04 (TYO): Tsüngrem külemba nung ken ya kanga tongtibang shilem, ta tangatetba nung ABAM Music Ministry nung Mrs. Asenla Longchar, ABAM Music coordinator lenisüba nung 2023 kuma Zone wise Music training agüja adutar, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Tanü putu nung ken ya asenok asoshi tekülem mapang nung kanga tongtibang shilem ka lir; yamaji lirumedema tabensaba nung ken atenba ajanga Tsüngrem sentsüwangshidaksüba den külemi asenoki tepela angur. Amangbapurtem ajaki ABAM Music Ministry asoshi takok aser temoatsü meshia sarasademtsü ayongzüker, ta agütsür aser tang zone 3 & 4 kasa sangdong ajanga Impur nung Arogo 11 nungi

parnok 35 arua May 2, 2023 nungi training tagidak lir.

Tanü putu nung ken ya asenok asoshi tekülem mapang nung kanga tongtibang shilem ka lir; yamaji lirumedema tabensaba nung ken atenba ajanga Tsüngrem sentsüwangshidaksüba den külemi asenoki tepela angur. Amangbapurtem ajaki ABAM Music Ministry asoshi takok aser temoatsü meshia sarasademtsü ayongzüker, ta agütsür aser tang zone 3 & 4 kasa sangdong ajanga Impur nung Arogo 11 nungi

metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Pungi

(v) memeshi memerük endokba (cleansing of sin ritually)
* Tejen putu nungbo pei menaba temenen **pungitsü** atema tzü chigudoki ao.

Punglok

(v) terongdong nung aben (carried on the back)
* Kinungtsüi soruchiokdang kinungboi tanur **pungloker** ata.

OLONG PAITEP # 6505

1		2		3		4	5			
				6						7
		8								
9				10		11				
			12						13	
						14				
16						17				

TIPLÉN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S_ _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6504 TELANGZÜBA

TIPLÉN :

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer,
- 9. Anema, 10. Jabili,
- 11. Among, 12. Miim,
- 13. Anem.



ALOKBA OBOULA NUNGI O AIKA ANGAZÜKER :

- Alokba** : Obou, ya koloni apusorba?
- Oboula** : Aeee, "Nashi pongchi amzü takong mejaka yim anüker" amai ati.
- Alokba** : Waa Obou aji kechi tetezü?
- Oboula** : Nenok tanü asüng lanurtemi memetetashi, akhidangbo Aoli yim ajak nung takari nashi tululu metsüteta yim akhüm ama, aremia moi yimdak dang "Raja" amai metsüako, onoka joko tambur kümerji yim anüker ati.
(Tanga anogo nung)
- Alokba** : Obou kongi aoer?
- Oboula** : Oboula yimlusür ati.
- Alokba** : Obou aji kechi teyezü?
- Oboula** : Oboula nung kecha mapa maliji yimtung süa senzürba "Yimlusüra" ta jembirba ati.
- Alokba** : Obou kanga pelara, aika angazüko.

- Lilir : WhatsApp

Amit Shah Manipur CM den jembia state nung tensa asadangogo



Imphal, Monupii/May 4 (Agencies): Union Home Minister Amit Shah-i Brehostibarnü Manipur Chief Minister N Biren Singh den jembia state nung tensa asadangogo, kong tribal temi longkak aitba sülen mepetmesü tulu adoka liasü.

Centre-i Manipur nung tensa kanga junga asadangdar aser state kübok mepetmesü adoker aliba tesemtem-i Rapid Action Force (RAF) yokogo.

Ketdangsurtemi ashiba agi, Union Home Minister-i Manipur Chief Minister den jembio, shibai state tensa indang aser tensa azüoktsü atema jenjang agibatem indang metetdaksüogo.

Army aser Assam Rifles sepaitem tensa mejungi aliba tesemtemi yoker lir.

Iba force ana dak alia mepetmesü adoker aliba tesemtemi yoktsü atema Manipur nung tanga paramilitary force peria liasü.

Official sources ajanga ashiba agi, RAF company pongu Imphal-i yokogo aser kasa mapang nung tanga general duty company 15 dang state kübok tesem balalai aotsü atema renema alitsü asoshi tetuyuba agütsüogo.

Manipur nung mepetmesü adoker aliba tesem balalai yoktsü atema CRPF company 15 shi renema lir, ta source-i ashi.

Non-tribal Meiteis temi Scheduled Tribe (ST) jenjang atema akhangba anema Churachandpur district kübok Torbung tesem nung All Tribal Student Union Manipur (ATSUM)-i ayongzüka 'Tribal Solidarity March' ka agiba mapang Bodhbarnü Manipur kübok tesem balala nung mangatetep adoka liasü.

Rally nung longkak aiter meyirejang aikati shilem agi aser iba mapang tribal tem aser non-tribal tem mangatetep adoka liasü, ta police ketdangsur kati ashi.

Tensa azüoktsü atema police-i tear gas shell aika khalokja liasü, ta ketdangsurisa metetdaksü.

KSU-i ozüng alema state-i arurtem kümzüka mayutsü tuyu

Shillong, Monupii/May 4 (Agencies): Meghalaya-i ozüng alema migrant tem anir arurtem aser tejenokdak agütsürtem nem Khasi Students Union (KSU)-i tekümdangtsü metetdaksüogo.

KSU aser Ri Bhoi Youth Federation Umsning Circle na longjemmer meita aoba mapang Mongolbar aonung Ri Bhoi nung kuli kaketejanga maliba aayangertem mener aliba tata gari ka sotba sülen iba tekümdangtsü metetdakja liasü.

Immigrant tem yagi Interstate Migrants Workmen (Regulation of Employment and

Condition of Service) Act 2011 nung aibelenba nguteta liasü.

KSU-i, police dang ozüng alema migrant tem anir arurtem anema jenjang tapet agitsü asoshi mepeshia metetdaksüogo aser ken o maneni bushisingdangtsü atema item aayangertem ya Umsning Police Outpost nem bendanga agütsüogo.

KSU Umsning Circle tir Lester Nongbet-i iba tatalokba indang osangbenertem den sensaksema liasü. Pai ashiba agi, taoba ita-a ozüng alema state-i aruba migrant tem mener aliba bus ka sota liasü.

Iba sülen KSU-i Byrnihat

nung Infiltration Check Gate semdangogo aser gate nung ketdangsurtemi kuli kakettek kanga junga asadangtsü ta tenangzüka agütsüogo.

Ajisüaka tawa tatalokba ajanga ketdangsurtemi parnoki nangzüba ama minyakba kuli sayur, kechiyong kuli kaketejanga bena maliba aayangertem mena aliba tata gari ka iba check gate ajangtetogo, ta KSU-i ashi.

Maneni ozüng alema migrant tem anir arur aser tejenokdak agütsürtem anema KSU-i jenjang tesashi agitsü tenangzüka agütsüogo.

Tripura nung corporators asem yakta mintoktsü

Agartala, Monupii/May 4 (Agencies): Tripura nung BJP aser Agartala Municipal Corporation (AMC)-i, corporator asem aser BJP lenirtem mintoktsü. Parnok ya party anema inyaksangshiba aser yimya yimpong shidak mebenshiba atema mintoktsü.

BJP nung source balalai ashiba ya amangdi süra AMC-i taruba anogo ishika tsüngda corporator Alak Bhattacharya, Shilpi Sen, aser Lata Nath nung anema jenjang agitsü.

Parnok rongnung Alak Bhattacharya aser Shilpi Sen na party anema inyaksangshiba atema aitsür lir.

Corporators ana yagi taoba Tripura Assembly election nung party candidate nem tenokdangba agütsüba, party atema nüboyimba sentong nung shilem magi aser opposition

party candidate tem pusemba aitem aitsür lir.

Kasa mapang nung Bhattacharya-i mapang talangka council senden nung shilem magi-i arudar.

AMC temzüng ozüng kübok pa senden asem nung atonga shilem magira pa indang membership agintsütsü.

AMC election nung candidate ka akümba sülen Alak Bhattacharya-i pa mayor akümtsü ta shia liasü.

Pai kibongshiai tua nübuyima senzü aser ashiba agi, pai election kokra pa mayor akümtsü.

Kasa mapang nung party-i, Shilpi Sen-i party anema inyaksangshiba aser Bordowali Assembly Constituency nung Tripura Chief Minister Dr Manik Saha anema inyaksangshiba ngutetogo.

Source-i ashiba agi, taoba Assembly election nung BJP candidate Dr Saha tsükdaktsütsü atema pa Congress aser CPI-M den longjemmer inyaksangshia liasü.

Maneni ano corporator-sa Lata Nath-a yimayimpong shidak mebenshiba atema aitsür lir.

Pa indang noksa tang social media nung ayimsünga prokshio.

Pa külem mapa inyaker ka den medemba indang noksa tang nisung ajak indang mobile phone nung lir.

Party-i parnok asem nem mapang talangka tejakdang tekümdangtsü metetdaksüogo, ajisüaka parnoki süoki ia magi.

Tang parnok asemprongla corporator mapa aser party nungi agintsü atema inyakyim tenzüko.

AO KAKETSHIR TELONGJEM SHILLONG



ADMISSION HELPLINE 2023

The office of the AKTS would like to extend our aid to students who have chosen Shillong as their destination for their further studies.

Table with 4 columns: Sl. No., Name of Institutions, Name of Person, Contact No. Lists 12 institutions including St. Anthony's College, St. Edmund's College, St. Mary's College, etc.

For further queries contact:

President Sentiakum Imchen (6009361037)

General Secretary Yimsenna Jamir (9366259998)

aktsshillong18@gmail.com

aktsshillong

Sudan nung ceasefire tasen tenzükaka rara manener

04 (Agencies): Sudan linük yimtiba, Khartoum nung maneni kanga sashia khataper, kong army temi tir aliba ki aser army headquarters temeket nungi paramilitary Rapid Support Forces (RSF) meindoktsü meranger, koba April 15 nü tenzükba rara nung anogo tenet ceasefire alitsüla sernung raraba manener.

Khartoum mesük Omdurman aser Khartoum yimti nung Brehostibarnü bomb tesashi apokba osangtema lir.

Iba rara nung nisung 550 süogo aser nisung 4,926 yirua lir, ta Sudan nung osangtema ajanga Mongulbarnü shia liasü.

Tangatetep ken o ka mejembidang linük yimtiba atsüngdoktsü meranger amai ajiteter aser telok ana indang lenir army chief General Abdel Fattah al-Burhan aser RSF lenir General Mohamed Hamdan "Hemedti" Dagalo na dak jembishinü akatsü tejangraba kangabo majiteter.

Al-Burhan indang envoy Dafallah Alhaj-i osangbener dang ashiba agi, tezüngzüktep ya ceasefire atema dang aser rara atema pangzüng yanglutsü asoshi tetsüngtai aitsüba indang masü.

"Onok atemabo pangzüng tatembangbaji ali nung lemtettsü. Ozü delegation temi parnok den tejak jitepa jembiba nung shilem magitsü mesüra parnok den osangtsüsang

agiteptsü atema channel melapoktsü," ta pai ashi.

Hopta tetenzüklen Sudan nung rara adoka aliba telok ana tsüngta Brehostibarnü nungi tenzükba anogo tenet ceasefire alitsü tepang agi molungtepa liasü, saka Khartoum region nung tayimtsü amshia amakba indang injang khaloktsüba tali atalokba ajanga iba sentong nung meinpronger.

Taoba mapang anogo ishiba ceasefire alitsü lemtetba nung junga manidakba yong May 4-11 ceasefire tezüngzüktep nung temolunglemtsü kangabo meliasü.

Kasa mapang United Nations ajanga Sudan nung mangatetep adoka aliba telok anaprong dang humanitarian aid tem shidak yokdaksütsü Bodhbarnü shia liasü, kechiaser iba ama teyari agütsüba gari tulu trok nungi rakzük-raktema liasü.

Teyari agütsütsü osettsüset bena aliba gari tem shidak senzüdaksütsü atema anogo ana nungi asem tsüngta Sudan nung rara adoka aliba telok anaprong den tejak o tejak jitepa amentsü imlar, ta UN aid chief Martin Griffiths-i ashi.

Rara tenzükba hopta ka arudang UN nung inyaker nisung meyerijang aika anizükba ao aser UN agency temi parnok mapa kar anena liasü. Sudan south tsütsü khatepdang World Food Programme (WFP) nung

inyaker asem tepsetba sülen parnok inyakyima anena liasü, saka ano tanaben tenzüktsü ta shiogo.

Rongrongshirong adoka lia staff aser supply agi meperi komasür UN agency tem mapa inyajakar ano mejangja.

Army aser RSF tsüngta raraba ajanga meimchir timtem balala ajurutsü aser danga linüktem nunga prokshia aotsü, ta UN-i tekum dangtsü shia lir.

Rara metenzük dang Sudan nütsüng yongsük million 45 nungi shilem asem dangari teyari balala agütsüba nung metaloker liasü aser tangbo sen agi meperir, ta UN agencies ajanga ashir.

Nisung 100,000 shi Sudan yutsür kidanger linüktem nung oa jenoka lir aser mepetmesü tenzükba tang tashinung Sudan nung nisung 42,000 dak tema den bendanger 2,300 shi Egypt leni ogo, ta UN ajanga ashir.

Khartoum nungi mile 500 shi pilar Sudan indang arütsü aser Port Sudan nung tongtipang services tem agi anüngba indang teyari mapa inyaker temi ashir.

WFP ajanga ashiba agi, Sudan nung yua aliba chiyongtsü metric tonnes 80,000 aliba nungi metric tonnes 17,000 bo ayuaogo aser item ya Khartoum aser Western Darfur nung yua liasü, ta UN deputy spokesman Farhan Haq-i Bodhbarnü ashi.

Israel-i Nablus nung Palestine nung asem tepset

Ramallah, Monupii/May 04 (Agencies): Occupied West Bank north tsütsü Israel army temi Nablus nung tesem ka mita aodang injang khalokja Palestine nung asem tepset aser pezü yirutsü, ta Palestine ketdangtsür temi ashi.

Gaza Strip nung sapanger yimsü asüba Palestine nung telok, Hamas ajanga sangdong ka nung nisung asem, Hassan Qatnani, Moaz al-Masri aser Ibrahim Jabr ya par züngsem ta shiogo.

Israel army aser itdangiter temi sangdong ka nung ashiba agi, April 7 nü Jericho north tsütsü prangbong bena alirtemi gari ka nung injang khalokja tetsür adianu ana tepsetba ya parnok mapa lir. Mapang tatsüka lir tena tetsü ya iba lendong nung yiruba zübu agi asü.

Hamas teloki sangdong ka nung iba lendong agütsüba tenüng agi aser nisung asem tepsetba ya Nablus yimti nung alir 'hero' tem tepsetba lir ta ashi.

Nisung asem atema asüpila sentong agidang Nablus nung telok balalai amakba mechi Brehostibarnü longkak aittsü sangdonga liasü.

Nablus nung alirtemi osangbener dang ashiba agi, undercover units tem densema Israel sepaitemi anepdang Old City of Nablus ya amak. Iba sülen sepaitemi ki ka lungbang aser iba telung nung aliba Palestinian fighter den khatapa

liasü. Nisung pezü mozü kidangi anir ogo aser Israel nungeri iba mapa inyakdang school tanurtem densema nisung 150 shi tear gas agi timtema liasü, ta Palestinian Red Crescent ajanga ashi.

Asürtem den tepila sentong agidang nüburtemi mang ayangtsü yimyim ayima liasü.

Ano Brehostibarnü Israel sepaitemi arishi küm 26 tain Palestine tsür ka Huwara nung khaset, shibai kodari agi dangar dak atsüng ta tai tonglokja liasü.

2023 küm tenzükba tang tashinung Israel army aser settlers temi Palestine nung nisung 107 shi tepsetogo aser item rongnung 20 bo tanur lir, ta health ministry ajanga ashir.

Item rongnung arishi küm 44 tain Palestine nung tepuokdak alisang Sheikh Khader Adnan densema lir, shiba tabi agi aiben apuba anema lumia longkak ait tenzükba anogo 87 buba nung Mongulbarnü asü.

March 5 nü pua mitkar temi ken o jembitsü ataa alisang Adnan asüba ajanga nüburtem jashia occupied West Bank nung longkak aita Gaza Strip nung aliba armed resistance telok temi Israel dak rockets khaloktsü.

Mongulbar aonung Israel nungeri tayimtsü amshia Gaza Strip amakdang arishi küm 58 tain Palestine nung Hashel Mubarak tepset aser ano nisung pongu yiruja liasü.

Ukraine-i Tir Putin tepsettsü merang: Russia

Moscow, Monupii/May 04 (Agencies): Kyiv-i Bodhbarnü aonung Kremlin nung Tir Vladimir Putin aliba ki nung amaktsü merang, ta presidential administration sangdong ka ajanga ashi.

"Nisung mena maliba tayimtsü anati Kremlin dak tenük yok. Mitkar aser special services temi mapang shidak nung radar warfare systems amshiba ajanga tayimtsü ya raksatsü," ta sangdong ajanga ashi.

Iba ajanga nisung yiruba mali aser linük tekolakba inyaksangshi nung temelenshi mali.

Russia tir indang odongtar Dmitry Peskov-i osangbener dang ashiba agi, Ukraine nung drones temi amakdang Putin ya Kremlin nung meliasü, tanü pa Moscow anasa Novo-Ogaryovo nung par kidang nungi mapa inyaker. May 9 nü Red Square nung parade alitsü sentong yanglua aliba memelenshi, ta Kremlin odongtari ashi.

Kyiv inyakyim ya kiralongra mapa ka lir aser May 9 nü Victory Day

amungtsü lia tir tepsettsü merangba amai Moscow-i züngshir. Russia-i iba ama inyakyim nung mapang tetemsü nung telangzüba agütsütsü temeden lir, ta ashi.

Ukraine ketdangtsür temi iba taitsüba nung telangzüba agüja mali.

Iba tatalokba atema Kremlin-i kuli kecha magütsü aser par sangdong nunga tejangja mashi.

Russia nung social media aser mitkar indang news outlet Zvezda nung video ka prokshiba nung Kremlin Palace tesülen mokozü adoka aliba nguogo, saka iba video ya tejangja masü.

Küm ka tejangdang Putin-i tashi ajak amshia Ukraine amaktsü totuyuba agütsür tang Ukraine sepaitemi Russia nung ket nungi tesem balala rakzüktsü teimla nung meyerper raratsü renemshiba mapa iba lendong ya atalok.

Ukraine Tir Volodymyr Zelenskyy tang Finland nung lir aser ano pa Germany-i aotsü sentong lir, shibai anüolen tembar linüktem dang mitkar tsütsü teyari meshia jajar.

Erling Haaland-i Premier League record tasen ka yangluogo



Monupii/May 4, 2023

(Agencies): Erling Haaland-i season ka nung goal 35 idakja Premier League nung otsü tasen ka yangluogo. Manchester City-i goal 3-0 agi West Ham akokba asaya nung pai goal ka idakja iba otsü tasen yangluo aser kasa mapang nung City pur temaba jenjangi tuogo.

Premier League point table nung City pur point ka agi Arsenal dang nungi timba lir aser parnok asaya ka tajemba asayar lir.

Iba asaya nung West Ham pur Declan Rice, Tomas Soucek aser Nayef Aguerd nung ajak shirangba ajanga shilem magitet aser asayar kar yirur aliba ajanga David Moyes-i outfield substitutes pongu dang yokteta liasü.

Ajisüaka Moyes-i aniba

team yagi minute 50 ashi City pur nem goal midaktsüi kanga meranga nokdang, shirnok relegation zone-i aitsü ana nung lir.

Asaya nung City atema mezümbuba goal ya Riyad Mahrez-i metsüba free-kick ka Nathan Ake-i kanga junga tongokja idaktsü.

Iba sülen Jack Grealish-i agütsüba ballka Haaland-i kanga junga agizüka bener lur Lukasz Fabianski tekolak adena kanga junga metsüokja liasü.

Iba goal idaktsüba sülen Haaland-i, 1990s nung Blackburn aser Newcastle nungi asayaba mapang Alan Shearer aser Andy Cole nati goal semer pezüzü (34) idaktsür aliba ajatetogo.

Ajisüaka Everton nungi asayar Dixie Dean-i 1927/28

nung English top flight nung season ka nung goal 60 idaktsür aliba yabo pa tera agi memeneptsü akok.

Maneni asaya nung Phil Foden substitute ama aitba sülen asaya atemtsü minute pongu shi anunga lia Emerson Palmieri dak tsükdaker adokba ball ka kanga junga idakja parnok asaya goal 3-0 agi akok.

2023 küm City puri kidang asaya 13buba atonga akokba sülen Pep Guardiola-i aniba team ya season trok nung Premier League title pongububa abentsü ana nung lir.

Parnoki tanungba asaya pongu nung asaya pezü dang akoktsü nungdaka kümogo.

Iba asaya makokba sülen West Ham pur asaya pezü asayatsü anunga lia relegation zone-i point pezü agi dang mai lir.

Medals & award ajak meyipa agütsütsü mulunga lir: Photgat & Punia

Monupii/May 4, 2023
(Agencies): Delhi Police-i mejudi beshiba sülen longkak aita aliba wrestler temi parnok indang medal aser Padma Shri densema award ajak sorkar nem meyipa agütsütsü ta Brehostibarnü shiogo.

Bodhbar aonung 11 akoshi nung wrestler tem mejangtsü atema yipden bener aruba mapang police temi parnok dang ken o ashishiba sülen mangatetep adoka liasü.

Vinesh Phogat aser Sakshi Malik nati ashiba agi, police temi parnok nongtok aser mezügmeshia liasü.

Sangeeta Phogat adianu Dushyant densema wrestler ana yirua liasü.

"Wrestler tem dak yamaai dang beshiti süra medal tem ya kechi nung agitsü. Iba melena onoka tangar ama dang lidi aser medal aser award tem ajak India sorkar nem meyipa agütsüdi," ta Bajrang-i ashi.

Vinesh, Sakshi aser Bajrang nung ajaki Khel Ratna agizüker lir. Skashi (2017) aser Bajrang (2019) nati Padma Shri-a agizüker lir.

"Police temi onok nongshia

mezügmeshiba mapang onok ya Padma Shri ngur alirtem ta yimdangi marur," ta pai ashi.

"Parnoki onok dak mebeshitsü yimya beshir. Tetsür aser jalatem yimtung nung taochi asoshi mener lir, saka shingaia ochi obendang angutsü atema süoki ia mebilemer," ta paisa ashi.

Wrestlers tem ya WFI tekolakba aser BJP MP Brij Bhushan Sharan Singh anema sexual harassment ken o benoker aliba dak sendakba nung longkak aita arudar.

"Medal ajak agiang. Onok kanga maksütsüogo. Onok maitsü atema rara saka parnok nung longkak aita arudar. Tetsürtem mezügmeshitsü atema teburtem ajak nem temeden agüja ali asü," ta Vinesh-i ashi.

"Onoki onok indang medal ajak meyipa agütsütsü aser nungdang dang süra taküma bendanga agütsütsü ajisüaka onok nem ochi obendang danga agüjang," ta lai ashi.

Tzünglur aruba ajanga mattress tem metenadokba sülen mattress talila aser yipden bener aruba mapang police aser

longkak aiteritem mangatetep adoka liasü.

Delhi Police-i ashiba agi, AAP lenir Somnath Bharti-i yipdentem bener arutsü.

"Somnath Bharati-i masü saka onoki yimpendem bener arutsütsü ashi. Aser pai bener arutsü yonga kechi tai ali, onokbo mejangtsü dena temeden mali asü. Yipden bener arua onoki ozüng alema inyaksangshi asü, mesüra bomb hadir balala bener aru. Parnoki kanga mejungi beshiogo," ta Vinesh-i shisem.

Bajrang-i ashiba agi, kechiba inyakyim ajak yimden yimsüsüba dak sendaka ali aji mangatetter. Khen khen Aam Aadmi party, Congress, aser khen khen BJP. Iba ken o ya tetsürtem dak sendaka lir saka political party balala den sendaktepja linük anisar.

"Police-i Brij Bhushan pusemer. FIR benokba sülen onok mezügmeshir. Wrestler tem caste dak ajemdaker lemdangtsür. Ni sorkar dang yimden yimsüsüba toktsü wrestler tem nem ochi obendang agütsüra linük ajungai kanga pelatsü, ta shiner," ta pai ashi.

World Boxing Championships: Narender quarters-i iogo

New Delhi, Monupii/May 4 (Agencies): Tashkent, Uzbekistan nung tang asaya aliba Men's World Boxing Championships nung Brehostibarnü India nung asayar Narender Berwal quarter-finals-i iogo aser kasa mapang nung Govind Sahani aser Deepak Kumar nata pre-quarters-i iogo.

Taoba küm iba asayamung quarter-finals nung tsükba sülen taküm Narender (+92kg) temulungtetba tulu nung asayadar aser pai Brehostibarnü Tajikistan nung asayar Muhammad Abroridinov 4-1 agi koka liasü. Asaya anaprongla yagi 2022 Asian Championships nung bronze medal ngur liasü.

Pa quarter-finals nung Cuba nung 2021 World Youth Championships bronze medallist Fernando Arzola den asayatsü.

Brehostibarnüsa 2022 Thailand Open champion Govind (48kg) aser 2019 Asian silver medallist Deepak (51kg) natia pei tata asaya kokogo.

Govind, shibai taküm kanga junga asaya arudar aser

Nationals Championships nung gold medal aser 74th Strandja Memorial nung silver medal ngua lir pai Tajikistan nung asayar Mehron Shafiev 5-0 agi koka liasü.

Kasa mapang nung Deepak-ia Ecuador nung asayar Luis Delgado unanimous decision agi koka liasü.

Govind taruba asaya Georgia nung top-seeded asayar Sakhil Alakhverdovi den asayatsü aser Deepak-a Kazakhstan nung Tokyo Olympics bronze medallist aser reigning World Champion Saken Bibossinov den asayatsü.

Hokolbarnü Mohammad Hussamuddin, Ashish Chaudhary, aser Naveen Kumar nungera pre-quarters nung asayatsü.

Hussamuddin (57kg) China nung asayar Lyu Ping den asayatsü, Ashish (80kg) Cuba nung Olympics nung gold medal ana tashi ngur aliba asayar Arlen Lopez den asayatsü aser Naveen (92kg) South Korea nung Jeong Jaemin den asayatsü.

Uttam lenisüba nung India hockey team Junior Asia Cup asayatsü

Monupii/May 4, 2023

(Agencies): Forward Uttam Singh lenisüba nung India team Junior Asia Cup nung asayatsü atema Brehostibarnü shimogo. Iba asayamung ya Salalah, Oman nung May 23 nungi June 1 tashi asayatsü.

Iba asayamung ya December ita Malaysia nung asayatsü aliba FIH Junior Men's World Cup atema qualifying asayamung ka asütsü.

India team pool A nung Pakistan, Japan, Thailand aser Chinese Taipei den ata lir aser Korea, Malaysia, Oman, Bangladesh aser Uzbekistan nung pool B nung lir.

Uttam ya Uttar Pradesh kübok Karampur yimtsüng nungi lir aser taoba küm November ita Sultan of Johor Cup nung Australia team goal 5-4 agi akokba asaya nung pai shootout nung goal ana tashi idakja liasü.

Final nung goal idaktsürtem rongnung Vishnukant Singh aser Sudeep Chirmako nata India team nung züngoksema lir.

Maneni Uttam, Bhubaneswar nung 2021 küm World Cup asayaba mapang India team nung densema liasü. Iba asayamung nung parnok semifinal tonga asaya ajisüaka Germany-i tsükdaktsü.

Uttam nem teyari agütsütsü atema Bobby Singh Dhama shimogo aser Mohith HS o Himwaan Sihag na goalkeeper asütsü shimogo.

Midfield nung Vishnukant Singh densema lir, shibai Rourkela nung FIH Hockey Pro League asayaba mapang kanga junga asayaogo. Midfield nung pa den Rajinder Singh, Poovanna CB, Amandeep aser Sunit Lakra nung shimogo aser forward line nung Bobby, Arajjeet Singh Hundal, Aditya Lalage, Uttam, Sudeep Chirmako aser Angad Bir Singh nung shima lir.

"Team nung experience asayartem densema lir aser parnok rongnung karbo senior team nunga asayaogo," ta coach CR Kumar-i ashi.

Team nung asavartem yamai alitsü:

Goalkeepers: Mohith H S, Himwaan Sihag.

Defenders: Shardanand Tiwari, Rohit, Amandeep Lakra, Amir Ali, Yogember Rawat.

Midfielders: Vishnukant Singh, Rajinder Singh, Poovanna C B, Amandeep, Sunit Lakra.

Forwards: Bobby Singh Dhama (VC), Arajjeet Singh Hundal, Aditya Lalage, Uttam Singh (C), Sudeep Chirmako aser Angad Bir Singh.

BILEMDANGANG

"Tashi angaba ya sempet ajak rongnung tajungtiba ka lir."